

Ministar unutrašnjih poslova Kantona Sarajevo Ismir Jusko, rođen je 18. Juna 1971. godine u Zuttlingenu – Savezna Republika Njemačka.

Osnovnu i srednju školu završio je u Sarajevu, kao i Fakultet za sport i tjelesni odgoj Univerziteta u Sarajevu, na kojem je magistrirao i pohađa doktorski studij.

Tokom 25-godišnje radne i sportske karijere, ostvario je zavidne rezultate i dobio eminentna domaća i međunarodna priznanja, a u svemu što je radio, stekao radno i menadžersko iskustvo.

U Ministarstvu za unutrašnje poslove BiH radio je od 1990. do 1996. godine, gdje je u Specijalnoj jedinici policije obavljao poslove i zadatke od policajca specijalca, komandira odjeljenja, komandira voda, zamjenika komandira čete, do pomoćnika komandanta Specijalne jedinice. U ovom periodu također je bio instruktor taktike specijalnih dejstava, antiterorističke borbe, bliske zaštite VIP ličnosti, specijalne i opće fizičke pripreme pripadnika Specijalne jedinice MUP BiH.

Branilac je Grada Sarajeva i Bosne i Hercegovine od početka agresije na našu zemlju, a ministar unutrašnjih poslova BiH ga je za hrabrost i požrtvovanje odlikovao **Pištoljem sa posvetom**.

Od decembra 1996. do marta 2007. godine bio je uposlenik Ambasade Sjedinjenih Američkih Država u Sarajevu, gdje je obavljao dužnost šefa Tima za antiterorizam. U tom periodu, proveo je pet mjeseci na edukacijama u SAD u posebnim kampovima za antiterorizam, gdje je uspješno završio kurs za borbu protiv terorizma i rješavanje kriznih situacija.

Tokom rada u Ambasadi SAD u Sarajevu, za svoj rad je dobio devet priznanja od **State Department-a**.

Kao instruktor je radio sa Ministarstvom sigurnosti BiH - Specijalnom jedinicom BiH – SIPA, Odjeljenjem za zaštitu VIP ličnosti i Jedinicom za specijalnu podršku Direkcije za koordinaciju policijskih tijela BiH, Agencijom za školovanje i stručno usavršavanje kadrova, te Specijalnom jedinicom Federalne uprave policije, Jedinicom za specijalističku podršku MUP Kantona sarajevo i Zatvorskom policijom.

Dužnost potpredsjednika uprave i direktor Poslovne jedinice Sarajevo kompanije **Sector Security** obavljao je od 2007. do 2010. godine, dajući veliki doprinos njenom unapređenju i razvoju kroz posebni angažman na uspostavljanju Akademije za edukaciju uposlenika, uvođenju standarda ISO, te formiranju i uspostavi novih poslovnih jedinica u Kompaniji.

U organizaciji Ambasade Ujedinjenog Kraljevstva u Sarajevu uspješno je završio 12-mjesečni kurs za obavljanje prezentacija, vođenje sastanaka i pregovora prema standardima EU i NATO. Zbog odličnih postignutih rezultata tokom ovoga kursa, na poziv **British Council** pohađao je i završio još tri instruktorska kursa iz navedenih oblasti.

Od 2010. do januara 2013., i od septembra 2013. do novembra 2014. godine radio je u Ministarstvu sigurnosti BiH – Agencija za policijsku podršku na dužnosti šefa Kabineta direktora, a od januara do septembra iste godine bio je savjetnik ministra sigurnosti BiH.

Sportom se bavi od djetinjstva, a takmičarsku karijeru krunisao je mjestom u Karate reprezentaciji Jugoslavije. Aktivni trening **Jiu-Jitsu**-a također mu je 2004. godine u Japanu donio crni pojas u ovom sportu, **BUDO** pasoš i licencu međunarodnog instruktora **Jiu-Jitsu**-a.

2013. godine u Lisabonu (Portugal) dobio je prestižno međunarodno priznanje **Master of the Year**.

Pored ovih disciplina, uspješno se bavi alpinizmom, ronjenjem i paraglajdingom.

Govori engleski jezik.